

C. ALMENN ÁKVÆÐI

21. gr.

Brot á reglugerð.

Brot á reglugerð þessari eða gegn reglum, sem settar verða samkvæmt henni, varða sektum allt að 10000 krónum, nema þyngri refsing liggi við samkvæmt lögum. Ef brot veldur skemmdum á eignum rafveitunnar, skal hinn brotlegi þess utan bæta skaðann.

Sektir renna í ríkissjóð.

22. gr.

Málssókn.

Með mál út af brotum á reglugerð þessari eða reglugerðum, sem settar eru samkvæmt henni, skal farið að hætti opinberra mála.

Reglugerð þessi, sem er sett samkvæmt vatnalögum, nr. 15 20. júní 1923, og raforkulögum nr. 12 2. apríl 1946, staðfestist hér með til þess að öðlast gildi þegar í stað, og birtist til eftirbreytni öllum þeim, sem hlut eiga að máli.

Atvinnumálaráðuneytið, 12. desember 1963.

Ingólfur Jónsson.

Þorv. K. Þorsteinsson.

REGLUR**um Félagsheimili Kópavogs.**

1. gr.

Eigendur félagsheimilisins eru: Kópavogskaupstaður, Leikfélag Kópavogs, Skátafélagið Kópar, Kvenfélag Kópavogs, Framfarafélag Kópavogs, Slysavarnafélag Kópavogs og Ungmennafélagið Breiðablik.

2. gr.

Hlutverk félagsheimilisins er:

- a) að stuðla að og efla hvers konar félags- og menningarstarfsemi Kópavogsbúa;
- b) að auðvelda hverja þá starfsemi, er miðar að bættu tómstunda- og skemmtanaliði barna og unglinga í Kópavogi.

3. gr.

Stjórn félagsheimilisins skipa 13 menn og jafnmargir til vara — einn frá hverju ofangreindra félagi og 7 fulltrúar frá Kópavogskaupstað. Hver fulltrúi fer með eitt atkvæði. Eigendum er heimilt að skipta um fulltrúa samkvæmt reglum viðkomandi félagsheildar.

Svo oft sem nauðsyn krefur, skal stjórnin koma saman til fundar um málefni félagsheimilisins. Aðalfund skal halda eigi síðar en 1. apríl ár hvert. Alla fundi skal boða bréflega með nægum fyrirvara. Fundur er lögmaður, ef til hans er löglega boðað.

4. gr.

Á aðalfundi skal stjórnin kjósa úr sínum hópi húsnefnd, er skipuð sé 5 mönnum og jafnmörgum til vara. Húsnefnd skal þannig kosin, að 7 fulltrúar kaupstaðarins kjósa úr sínum hópi 3 menn í nefndina auk varamanna og fulltrúar félaganna kjósa 2 menn úr sínum hópi og tvo til vara. Húsnefnd skiptir sjálf með sér verkum. Hún sér um allan daglegan rekstur og framkvæmir ákvarðanir stjórnar félagsheimilisins. Húsnefnd skal halda nákvæma gerðabók um störf sín. Hætti félagsheimilið störfum, skal afhenda Þjóðskjalasafni gerðabækur þess til vörzlu.

5. gr.

Húsnefnd skal halda fundi, er þurfa þykir. Skylt er henni að halda fund, ef tveir nefndarmenn æskja. Félagshemilið skal rekið sem sjálfstæð stofnun með sérstöku reikningshaldi. Almanaksárið skal vera reikningsár þess.

Fyrir 31. desember ár hvert skal húsnefnd leggja fyrir stjórnina áætlun um tekjur og gjöld á komandi ári. Eigi má efna til verulegra útgjalda nema samþykki stjórnarinnar komi til og gildir það jafnt um rekstrargjöld og stofnkostnað. Á aðalfundi ár hvert skal húsnefnd leggja fyrir stjórnina rekstrar- og efnahagsreikning fyrir næstliðið ár, endurskoðaða af löggiltum endurskoðanda. Reikninga og fjárhagsáætlun skal bera undir atkvæði stjórnar félagsheimilisins. Afrit af ársreikningi skal senda félagsheimilaskjóði.

6. gr.

Öllum hagnaði af rekstri félagsheimilisins skal stjórn þess verja sem hér segir í samráði við bæjarráð:

- a) til að ljúka byggingu félagsheimilisins,
- b) til að fegra félagsheimilið og síðan önnur opinber svæði eða byggingar í bænum með listaverkum,
- c) að lokinni byggingu félagsheimilisins til að styrkja félags- og menningarstarfsemi í Kópavogi,
- d) til að styrkja byggingu fullkomins íþróttasvæðis og sundlaugar og efla heilbrigða íþróttastarfsemi í Kópavogi,
- e) til að styrkja byggingu og/eða rekstur elli- og hjúkrunarheimilis í Kópavogi.

7. gr.

Aðalverkefni húsnefndar eru:

- a) að ráða nauðsynlegt starfslíð,
- b) að ráðstafa félagsheimilinu til afnota fyrir eigendur og aðra,
- e) að ákveða gjöld fyrir afnot hússins,
- d) að annast kaup nauðsynlegra tækja og áhalda,
- e) að sjá um bíórekstur, ef ákveðinn verður,
- f) að sjá um, að löggæzla sé á samkomum í félagsheimilinu, eða á annan hátt sjá um, að þar sé ekki brotið gegn ákvæðum lögreglusamþykktar Kópavogskaupstaðar.

8. gr.

Húsnefnd er heimilt að ráða framkvæmdarstjóra, er annist um daglegan rekstur félagsheimilisins, eftir nánari ákvörðun nefndarinnar og undir hennar eftirliti.

Húsnefnd skal gera skriflegan ráðningarsamning við framkvæmdarstjórn, þar sem m. a. skal ákveðið starfssvið hans og hvað af verkefnum skv. 5. gr. hann skuli annast. Ekki getur framkvæmdarstjóri félagsheimilisins átt sæti í stjórn þess.

9. gr.

Eigendur félagsheimilisins skulu eins og aðrir greiða leigu fyrir afnot hússins. Skylt er að heimila félögum, er greinir í 1. gr. laga nr. 77 frá 1947, svo og breyt-

ingum á þeim lögum frá 29. maí 1957, afnot af húsinu gegn hæfilegu gjaldi, ef eigi fer í bága við eðlilega þörf eigenda sjálfra fyrir húsið. Verði ágreiningur um, hvort önnur félög eigi rétt á afnotum af félagsheimilinu, sker fræðslumálastjóri úr, en úrskurði hans má skjóta til menntamálaráðuneytisins.

10. gr.

Leiga fyrir afnot félagsheimilisins skal ákveðin svo há, að nægilegt fé fái til þess að inna af höndum nauðsynleg gjöld, ef stofnuninni koma eigi aðrar tekjur.

11. gr.

Þess skal gætt, að húseign, áhöld, húsbúnaður allur og fatnaður sé jafnan hæfilega váttryggt.

12. gr.

Skemmdir á húseign, áhöldum og húsbúnaði umfram eðlilegt slit, skulu þeir bæta, er spjöllunum valda.

13. gr.

Í félagsheimilinu ber að hlíta almennum ákvæðum gildandi áfengislaga á hverjum tíma.

14. gr.

Á nokkrum stöðum í húsinu skulu vera innrammaðar reglur um umgengni manna og hegðun í húsinu.

15. gr.

Reglur þessar, sem settar eru skv. 8. gr. laga nr. 77 1947, um félagsheimili, öðlast gildi, þegar menntamálaráðuneytið hefur staðfest þær.

Framanritaðar reglur staðfestast hér með.

Í menntamálaráðuneytinu, 13. desember 1963.

F. h. r.

Birgir Thorlacius.

Knútur Hallsson.

AUGLÝSING**um umferð í Keflavíkurkaupstað.**

Með heimild í 55. gr. umferðarlaga nr. 26/1958 hefur verið ákveðið, að á einstefnuakstursgötum í Keflavíkurkaupstað skuli bifreiðum lagt við hægri brún akbrautar miðað við akstursstefnu.

Bæjarfógetinn í Keflavík, 30. desember 1963.

Hákon H. Kristjánsson, ftr.